



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tiryimyim@aolima

tir yimyim

TAPAK 8

Temang-telen tenla agütsüba  
asemsü agi teimba kümogo: Mandaviya

Clifford Miranda India U-23 men's  
team head coach kümogo



VOL. XX NO. 292 (ADOK 292) DIMAPUR ROGONÜ (FRIDAY)

LUROI (AUGUST) 04, 2023

₹ 5.00

## DC Kohima ajanga ILP indang jangjashitsür

**Dimapur, Luroi/August 03 (TYO):** Inner Line Permits (ILP) agütsütsüba dak sendakba nung Deputy Commissioner, Kohima, Shanavas C IAS ajanga jangjashitsüba sangdong ka agüja liasü, koba Commissioner, Nagaland indang office nungi totuyuba ka agütsüba ama inyaker alitsü.

Bengal Eastern Frontier Regulation, 1873 ajanga ILPS agütsütsü, mapa kuma inyaksü aser ozüing yanglua amshitsü

tashi District Administration küboki aiter. Iba ozüing den mapet inyaksangshiba ajak ozüing alema inyaker ama züingshitsü, ta Deputy Commissioner, Kohima ajanga ashi.

Anungji village councils aser wards ajak iba ozüing sülen anidaksü aser ILP agütsüba mesüra mapa kuma amshiba, mesüra iba lemtet anema aotsüsa temelaba agütsüba nungi pila alitsü metetdaksü, ta sangdong ajanga ashi.

## High Court-i Meitei-Kuki aliken o tang ama alitsü tuyu

**Imphal, Luroi/August 03 (Agencies):** Brehostibarnü Manipur High Court ajanga Meitei aser Kuki nungter tsüingta mangatetep aliba ali tang ama ayutsü (status quo) tuyu, koba tang kin ana tsüingta rara tenzükdak asütsü akok ta bilemer.

Iba tesem nung Indigenous Tribal Leaders' Forum (ITLF) ajanga nisung aika aremtsü sentong aliba nokdangtsü asoshi International Meitei Forum-i petition ka agütsüba langzüdang court-i iba totuyuba ya agütsü.

Court-i state sorkar, central

sorkar aser ozüing amshirtem dang yangji tzüzüing-ozüing amshia tensa azüoktsü asoshi tapet mera agütsü tuyu liasü.

Manipur High Court ajangasa ITLF aser Kuki-Zo kin dang nisung tasü mang aremtsü asoshi state sorkar dang hopta ka tsüingta ali meshiang ta tuyu liasü.

Mangatetep adoka aliba ali ta Bishnupur district kübok Torbung area nung lir, koba puti otsü nung tongtipang tesem ka lir, kong 13 buba century AD nung Manipur Khamba-i tongti shilem agia liasü

## Mokokchung nung IMI 5.0 round mezüngbuba August 7 nü tenzüksü

**Dimapur, Luroi/August 03 (TYO):** Sorkar tetuyuba dak ajemdaker IMI 5.0 mezüngbuba round August 7 nungi 12, 2023 tashi nung agütsü sentong renema lir, ta Deputy Commissioner aser Chairman, DTFI, Mokokchung ajanga sangdong ka nung ashi.

Ibai linük rangpen nung tanur küm 5 tashi aser tetsür mashisa alirtem shirnok vaccine magir lir, parnok asoshi asütsü.

District nung nisung shinga mezüdoki vaccine agiba, Full Immunization Coverage (FIC) inyaktetsü asoshi tetsükdaksü kaji talisa Tzurangkong aser Longnak tsütsülen khen asoshi arua alir nüburtem lir. Anungji iba ama tesemtem nung mejeta nüngdaka inyaksüla aser tanur shirnok vaccine agütsüputem lir, ajak bushia parnok nem vaccine-ji agütsütsüla, ta ashi.

Ano tetsükdaksü kaji olulu ajanga vaccine indang angazükpeter, vaccine agütsü nongnangba ya ka lir. Iba dak sendakba nung nütsüing nübur nem tangatetba shisatsü agütsütsüla aser vaccine agiba ajanga tanur südaksüba tashitak 12 nungi parnok kümzüka ayur ta asüba rajemdaksütsüla, ta pai ashi.

Vaccine agiba ajanga alima nung küm shia tanur million 3 tasüba nungi kümzüker.

Vaccination ta süra tongmelang agi asen temang nung bacteria, virus mesüra mim aliba koba ajanga tashitak balala adokdaksü, item mesen aser miimtem den raraba ta ashitsü akok.

Vaccine agiba nung kecha

tarendaksü mali, kechiyong iba ya agütsü temelaba magütsüdang aiben tendanga aser asadanger külen dang amshitsü melar.

Vaccine agiba side effect-ji tera shirangba aser ajem tuloktsüba tesem nung tera ayangba/ashiba dang lir. Vaccine agiba ajanga minute 30 tsüingda nisung lakh 10 rongnungi nisung ka dak dang serious allergic reactions alir. Iba ama tensa nung anepalutsü asoshi mozüki nung inyaker (medical personnel) nem koma inyaksü aser anepalutsü, item tesayuba shitak sayua lir aser tanurji timi anepalua kümzüker.

Tanur ka mapang kar nungbo ajem 4 tashia atotsü akok. Saka iba ajanga temang nung timtem marutsü. Iba ama vaccines asem-pezü agiba ajanga talisa kinü tanurtem temang nung tashitak nungi tekarababa kümzüker, ta sangdong ajanga ashi.

Pei aliba tesem anasatiba nung immunization asütsü asoshi pei sasa tenüing zülüoktsü atema UWIN app yanglua lir aser ibaji mobile number nungi <https://uwinselfregistration.mohfw.gov.in/login> link ajanga sütettsü.

Aji mesüra pei sasa anasatiba immunization asüba tesem nung oa tenüing zülüoka vaccination agitettsü. UWIN app nungi tenüing zülüoka inyaker asoshi Aadhaar card aser registration phone number nüngdaker. Tanur ajak vaccine agidaksütsüji senso ajak khuret aser teinyaksü lir, kechiyong iba ya ajanga dang tanur ka tashitak jenti nungi kümzüka litettsü aser parnok asoshi tarutsü jenjang tajungba nung yanglua toktsü, ta sangdong ajangasa ashi.

## Manipur mepetmesü tenzüker ita asem jungogo, tensa tajungba makumer

**Imphal, Luroi/August 03 (Agencies):** Manipur mimh kin ana tsüingta mangatetep adoka azüdokshi tenzüker August 3, 2023 nü ita asem jungogo saka yangi tang tashi tensa mejungi lir.

Brehostibarnü valley district nungi tetsür meyerijang dak tema adenshia Assam Rifles aser Rapid Action Force (RAF) den raratepa liasü.

Tetsürtemi security forces dang Bishnupur-Churachandpur arütsü nung parnoki Meitei nungter indang ta ashiba Torbung Gram Panchayat alema yokang ta asüingdanga liasü.

Item telok senshidaksütsü asoshi central security forces temi tear gas aser smoke bomb tem khaloktsüba mapang tetsür 50 aser TV journalist ka yirua liasü, aser parnok rongnung nisung ter kanga sashia yiru.

Torbung Bangla tesem ya tasü mang aremba tesem ka kumdaksüba asoshi longkak aita tetsürtem aika adenshia liasü.

Central forces temi longkak aiter tem den kanga sashia asatepa sülen telok senshidaksütsü asoshi tear gas aser smoke bomb khalokja liasü.

Tang mepetmesü adoka aliba nung asüba Kuki-Zo nisung 35 aremtsü asoshi Torbung Bangla tesem ya shimtet, saka tasü mang aremba nokdangtsü asoshi tesem balala nungi tetsürtem adenshidang iba mangatetep ya

Brehostibarnep 11:00 ako meta ataloka liasü.

Yirur aliba tetsürtem ya Bishnupur district kübok Moirang aser Kwata primary health centres (PHCs) temi anir ao.

Kangasa mejungi yirur alirtem ya Bishnupur district hospital-i yok, ta osang ajanga ashir.

**Sepai ka aser volunteer ka yiru**

Imphal West aser Kangpokpi inter district arütsü nung Brehostibarnü rongrong tasen adoka Manipur Rifles nungi sepai ka aser yimtsüing ka nungi volunter ka yirua liasü.

Anepdang 5:00 ako meta Koutruk yimtsüing nung prangbong bona aliba mejangjaba nisungtem den khatetpang 6 Manipur Rifles Battalion nungi arishi küm 47 tain rifleman Tourangbam Rishikumar dak injang agi kanga sashia yirutsü.

Injang ya pa tepok alema toko aser pa tang Imphal nung aliba Raj Medicity hospital nung temang anepaluba mapang lir.

Anasa aliba Senjam Chirang yimtsüing nunga anepdang 6:00 ako meta mejangjaba nisung kati injang khaloktsüdang iba yimtsüing nungi volunteer ka tetsüing abelen yirua liasü. Pa anasa aliba health centre ka nung iba zübu anepaluba mapang lir.

Langol Housing Complex nung tazüing aliba ki asem nung mi adoker anogo ka lir ano

rongrongshirong tasen adoka liasü. Osang angashili fire tenders aser den Bolero pump ka oa Bodhbarneep 9:30 ako meta mi ya remsepa liasü.

Ketdangtsür temi tang tashi iba mi adokba tejangja monguteti lir.

Manipur nung May 3 nü nungi tenzüka Kuki aser Meitei kin tsüingta azüdokshia aruba mapang nisung takum 150 dak tema agiogo.

Iba azüdokshia ajanga nisung meyerijang aika tesem balala nung prokshia lir aser ki o jen aika raksaogo.

**Imphal West nung curfew benok**

Imphal West district nung 'total curfew' benokogo. Manipur nung ketdangtsür temi iba district nung curfew tera salar aliba tanaben agiena total curfew kumdaksü.

Brehostibarnep züingta lia ano mepetmesü tasen adoka ajanga Imphal West nung iba ozüing benoka liasü. Iba lendong nung nisung 17 yiru, ta osang ajanga ashir.

Brehostibarnep Bishnupur district nung mejangjaba nisungtemi security forces indang prangbong 300 dak tema aser injang-bomb aika ayua bener ao, ta osang ajanga ashir.

Kasa mapang ano Kangpokpi district kübok tesem kar nungi Assam Rifles tem ainshiang ta takhangba agüja tetsürtem timba süir longkak aita liasü.

## Dimapur Police-i taila oset ayoker nisung trok apu

**Dimapur, Luroi/August 03 (TYO):** Titan Company Limited indang brands tem lir. Dimapur Police temi item dokan meita aoba mapang anütetsü 170, watch chain 128 aser dials 213 nguteta liasü, ta sangdong ajanga ashi.

Ano iba memsük Hazi Park market nunga LAKME indang cosmetic products taila ayokba mechi dokan ana indang kibur pua liasü, ta sangdong ka ajanga ashi.

Sonata, Titan aser Fastrack ya

Titan Company Limited indang brands tem lir. Dimapur Police temi item dokan meita aoba mapang anütetsü 170, watch chain 128 aser dials 213 nguteta liasü, ta sangdong ajanga ashi.

Ano iba memsük Hazi Park market nunga LAKME indang cosmetic products taila ayokba mechi dokan ana indang kibur pua liasü, ta sangdong ka ajanga ashi.

Police temi dokan ana nungya meita bushiba mapang LAKME

indang cosmetic products taila 1048 ngutet.

Dokan ana indang kibur anema M/S Hindustan Unilever Limited ajanga East Police Station, Dimapur nung ashishitep ken o ka benoka liasü.

Item dak sendakba nung ken o ana Copy Rights Act of 1957, Trademark Act of 1999 aser Indian Penal Code indang section balala kübok ken o ana East Police Station, Dimapur nung zülüoka lir, ta sangdong ajangasa ashi.

## BRO-i Mon aser Tuensang tsüingta apu ka yanglushitsü



**Dimapur, Luroi/August 03 (TYO):** Border Road Organisation (BRO) indang Project Sewak ajanga Tuensang aser Mon tsüingta tesendaktep tongtipang lenmang ka yanglushija liasü.

Tzünglu kanga sashia aruba ajanga anentsüh tulu alua feet 100 talang Bailey Bridge ya laodakja

liasü. Iba apu ya Thimlak yimtsüing anasa Km 18.050 nung July 16, 2023 nü lao.

Anungji Project Sewak kübok 15 BRTFindang 100 RCC ajanga tetsüing agi senzüsempongertem asoshi July 18, 2023 nü khen asoshi süngkum agi apu ka yangluja liasü.

Iba sülen anentsüh okdokba

sülen raksar aliba apu ya bushiteta feet 110 talang Bailey Bridge tanaben August 1, 2023 nü semzüka lenmang tesendaktep ya yanglushija liasü.

Nagaland nung aliba nüburtem asoshi lenmang tesendaktep tajung agütsütsü nükjidong yur Project Sewak-i meranga inyaker, ta sangdong ka ajanga ashi.

# Mokokchung DCC pur Tsüngremmung amung



**Mokokchung, 3rd Aug (TYO):** Aug 3 nü District Congress Committee (DCC), Mokokchung pur parnok kimen kidang Tsüngremmung sentong ka ayongzüka kaogo. Iba sentong nung Congress party meimer aika arua longsotepa munga liasü.

Iba sentong nung Nagaland Pradesh Congress Committee (NPCC) Tir, Supongmeren Jamir-i jembidang, 14 Nagaland Legislative Assembly election aliba mapang shirnokisa Indian National Congress meima pusemogo, parnok ajak dang pelaba metetdaksüo.

Tsürabur Dr. S.C Jamir aser R.C Chiten nungeri koda Congress party meima tenzüik, parnok tsüngsü mesamadaksüi iba party ya asentenshia tajungba bener aotsü asoshi pai party tenzüikertem ayongzüik.

2003 nungi tenzüika Congress party ya joko küm 20 dak tali opposition nung arur, aser tangbo

Congress MLA kata madoker, iyongji, asenok len sayur mali kümogo. Anungji, tang nungi nükla tajung yur 2028 election atema bendanga agütsür tenzüiksü paisa ajungshia liasü.

INC ya National party ka lir aser ibai tazüokba aliba party ka, yamaji Congress party tenzüiker ajak tazüokba nung alitsü merangtsüla, aji mesüra asenoki tangar memeneptsü, ta paisa shisem.

Taruba 2024 küm parliamentary election asen jakdang lir, iba atema joko luden shimogo aser parnok ajanga nübu tetemsü ka bushitsü, ta paisa MP election dak sentakba kar ashi.

BJP tamendakdaksi Rashtriya Swayamsevak Sangh (RSS) lir aser Congress party ji Secular nung amendaka lir. Anungji, Naga nung asoshiho Congress party ya tapet party ka lir, ta paisa ashi. Nagaland nung NDPP den ano tanga regional party ajak

BJP-i aniba sorkar nung denogo, tetezü joko parnok ajak BJP kümogo, ta paisa kuli kar dena shisem.

Paisa Congress züngsem bushiba nung temulung agütsütsü aser state, district, A/ C aser yimtsüing level tashi nung tongtepratep junga ayutsü asoshi ayongzüik.

Sentong nung 21 Tuli PCC member – P. Senti Tzüdir, 23 Impur PCC member & Ex. INC candidate – Bendangkokba, taoba MLA & Ex. INC candidate - Toshiokba, 27 Mokokchung Town nungi PCC member – Moa Emchen, 28 Koridang nungi PCC member – Imkongyanger parnokia tepela o den tayongzüikba onük balala bener arua lemsatsep. DCC executive, Lanusanen-i Tsüngremmung ratet lemsatsep. Mokokchung DCC, Tir – Watimongba Aier iba sentong nung menden liasü aser DYCI sobaliba ken ka aten.

# UGC-i university/institution taila indang metetdaksü

**Dimapur, Luroi/August 3 (TYO):** University Grants Commission (UGC)-i sangdong ka ajanga kaketshir, tsürapurtem aser nüburtem dang university aser institution tem koba shidak aser koba taila iba indang osang ka metetdaksüo.

UGC-i ashiba agi, university/institution kobasa legal acts (State, Central, or Provincial) kübok amenoka aliba mesüra UGC Act of 1956 agi temelaba

agütsüba university/institution temi dang degree tem agütsütsü tashi lir.

UGC-isa, parnok indang provisions den meputepi institution temi degree agütsüba ngutetogo. Temetetsü tongtibang kaji, iba amala mezüngoksemi aliba institution temi agütsüba degree tem ya higher education mesüra employment atema mamshitetsü, ta metetdaksü.

Secretary of UGC, Ministry

of Education, Government of India, Prof. Manish Joshi-i, nüburtem dang recognized institutions tem indang list reprangdangtsü atema UGC website (www.ugc.ac.in) semdangtsü mepeshia metetdaksüo.

Institution kar danga UGC temzüng ozüing anema inyaksangshiba potetra iba indang osang ya ugcampc@gmail.com dangi email asütsü metetdaksüo.

# I.Temjentoshi Lkr-i züluba 'O Tsuki' kaket sayaogo



**Dimapur, Luroi/August 03 (TYO):** Aitlenden Ward, Tuli nung alir I. Temjentoshi Lkr-i züluba 'O Tsuki' kaket Nukshimatong Pongen, SDO (Civil) Tuli ajanga Chiyungtsü Restaurant, Tuli nung Bodhnarnü sayatsüo. O Tsuki ya I. Temjentoshi Lkr-i züluba kaket tasembuba alitsü. Pa indang kaket nungi chapter kar Nagaland

University ajanga MIL subject nung amshir.

Iba kaket sayaba sentong nung Pastor, Aitlenden Baptist Arogo, Anungba menden liasü aser Pastor, Kangtsung Baptist Arogo, Nungsangtoshi ajanga sentong tenzüka sarasadema liasü.

Iba kaket sayaba sentong nung T. Nukshi Yaden, Chairman All Ward Union Tuli;

B.P. Wati, Pastor Incharge Tuli Town Baptist Church; Marsanen Imsong, tir, Langpangkong Tzukong Mungdang; M. Mar Lemtur, Chairman, Kangtsung Village Council aser tembar aser temolungertem dena liasü. Sentong tembanga Alemla, Associate Pastor Women, Aitlenden Baptist Church ajanga sarasadema liasü.

# Nagaland Police-i recruitment indang ken o jangjashitsü

**Dimapur, Luroi/August 3 (TYO):** Nagaland Police Department nung mapo nung anioktsüba indang osang ka social media sabang balala nung prokshidar. Iba dak sendakba nung Police Department-i lisapur ajak dang recruitment atema advertisement adokba

indang osang ya teyazü ta metetdaksüo. Official recruitment inyakyim kodang benoka inyaksangshidir, iba mapo nüburtem dang official Facebook Page ajanga official Press Release agütsüba atatsü asoshi metetdaksüo.

# Mupongchuket yimtak Tourism Multi-Utility Hall lapok



Mupongchuket yimtak Tourism Multi-Utility Hall lapokba sentong nung Mupongchuket Tourism Logo Department of Tourism Govt.of Nagaland Director Wt.Kedousiu M.Rio-i sayatsü dang tangokba noksa angur.

**Mupongchuket, Luroi/August 03 (TYO):** Tanu Mupongchuket yimtak Longrangtenem Park nung Tourism Multi-Utility Hall Department of Tourism Govt.of Nagaland Director Wt.Kedousiu M.Rio-i lapoktsüo.

Tourism Director-i iba ki lapoktsür kelen mapang tatsüka agia jembidang Mupongchuket nüburtemi nübur puatsüsa mapang tajung nükjidong yur ki tajung ka süa lapoktetba asoshi tourism department ajanga tanungsang tulu agütsür aser iba ki amshia alima nüburtem ajangzükdakjangta ayongzüka ashi.

Mupongchuket nüburtemi Tourism mapangtang meranga dang inyaka arudagi ano meranga ingyakang aser teyari nungtakra department-i akokba

lenmang ajak nung yaritsüta Tourism Director Wt.Kedousiu M.Rio-isa metedakja ashi.

Tanu iba sentong nung Mupongchuket Tourism Logo Department of Tourism Govt.of Nagaland Director Wt.Kedousiu M.Rio-i sayaja liasü.

Iba sentong ya Mopungchuket Community Tourism Society-i ayongzüka sentong agi aser sentong nung Mopungchuket Community Tourism Society tanir Limalenden Longkumer, Village Council Chairman Mupongchuket aser Mupongchuket Senso Mungdang nungertemi shilem agia jembiba den lokti balala aser Mupongsanger Putu yimsüsürtemi sobaliba sentong balala nung shilem agiba ajanga iba sentong kanga dang acha ketketa agia liasü.

# Yimyu Ward Mkg. nung Arok Kimen ki lapok



Yimyu Ward Mkg. nung August 2 nü "Arok Kimen" ki Water Resources Department, Government of Nagaland nung Chief Engineer, Er. Razouvolie Kelio-i (tabelen nungi anabuba) lapoktsür kelen Ward lenirtem den tangokba noksa.

**Mokokchung, Luroi/August 03 (TYO):** Yimyu Ward Mokokchung nung August 2 nü "Arok Kimen" ki Water Resources Department, Government of Nagaland nung Chief Engineer, Er. Razouvolie Kelio-i lapoktsüo.


Iba Arok Kimen nung ya Ward yimden, Watsü telen aser Ongpangkong Compound Youth Union (OCYU) office den yimyu nübur aser nungtakbapur amshitsü asoshi takdang tulu renema lir.

Ward yimden, Watsü telen aser Ongpangkong Compound Youth Union külemi yaritepa nübur yaritettsüsa aser nübur nungtak nung amshitetsüsa ki tajung ka sütetba asoshi Er.

Razouvolie Kelio tenungsang aguja ashi.

Er. Kelio-isa ki tajung ka süteter kelen iba kiji nüburtemi kanga dang junga anepalua amshitsü nungtaker, Aroki amshitetsüsa arok tangatetba nung ki tajung ka sütet nung iba ki ajanga nüburtem tajangzüik agitettsüta shisem.

Iba ki meshiteta Yimyu Baptist Arogo Pastor Puryapang-i lai zünga sarasadem aser Yimyu Ward Council Chairman, Yimyu Watsü Telen Tir, OCYU Tir aser Building Committee Convener parnokia shilem agia jembiba den Lipoktoshi ketdangtsüba nung iba sentong agir teloki sarasadema iba sentong tembang.



Five Years Without an Elected Administration  
Human Rights in Jammu and Kashmir  
August 1, 2022, to July 31, 2023  
Report Presentation  
The Forum for Human Rights in  
Jammu and Kashmir

August 03, 2023 nü New Delhi nung (abelen nungi) CPI(M) General Secretary Sitaram Yechury, Congress MP Shashi Tharoor, DMK MP Kanimozhi, kaketzülur Radha Kumar, J&K National Conference MP Farooq Abdullah, CPI(M) lenir Mohammed Yousuf Tarigami, NCP MP Supriya Sule aser RJD MP Manoj Jha nungeri 'Five Years Without an Elected Administration' report sayadang tangokba noksa nung angur. Iba report ya Forum for Human Rights in Jammu & Kashmir-i renema liasü.

### Lok Sabha nung NCT (Amendment) bill agizükogo

New Delhi, Luroi/August 03

(Agencies): National Capital Territory of Delhi dak sendakba nung ozüing yanglutsü atema Parliament dak tashi lir, ta Brihostibarnü Union Home Minister Amit Shah-i Parliament nung metetdaksü.

Brihostibarnü Lok Sabha nung Government of National Capital Territory of Delhi (Amendment) Bill, 2023 atema jembidang Amit Shah-i, "Iba ozüing ya Supreme Court-i tuyuba ama lir; National Capital Territory of Delhi dak sendakba nung ozüing mashie yanglutsü atema Parliament nem tashi agüja lir," ta metetdaksü.

Linük nüchiso anguba sülen Jawaharlal Nehru, Sardar Patel aser Dr Ambedkar nunger ama lenirtemia Delhi nem state jenjang agütsütsü anema nokdaka liasü, ta pai ashi.

Ibaji langzua AAP tongti aser Delhi Chief Minister, Arvind Kejriwal-i, iba bill ajanga Delhi nung alirtem temeden rakzükur, ta ashi.

Kejriwal-isa, "Delhi nung alirtem teyari mangutsüsa bill ka lir. INDIA-i ibaji kodanga matalokdaksütsü," ta ashi.

Delhi nung ketdangsertem madak Delhi sorkar nem tashi agüja lir, ajisüaka Delhi Ordinance Bill ya ajanga iba tashiji Centre sorkar nem agütsütsü.

Supreme Court tetuyuba ka ajanga Delhi nung services tashi sorkar nem agüja liasü, iba

sülen Centre sorkari Ordinance Bill ya renem.

Brihostibarnü Lok Sabha nung Delhi Ordinance Bill benokba mapang nung Amit Shah-i opposition teloktep (INDIA)-i iba bill anema AAP pusemba atema aija, "Delhi atema bilemang, teloktep atema mebilemstüla. Teloktep (opposition) tentetyonga onoki majority angutsü aser Narendra Modi ano maneni Ato kilonser akümtsü," ta ashi.

Opposition aija pai, "2015 küm Delhi nung party kati takok angu, saka parnok nükjidongji nüburtem tenzüksü atema masü saka raratsü atema dang liasü. Timtemji transfer aser postings atema temeden angutsü asoshi masü saka parnok ochimashi mimbangtsü atema parnoki vigilance department madak tashi angutsü meranger dang," ta ashi.

GNCTD Bill anema Congress lenir, Adhir Ranjan Chowdhury-i, Supreme Court obendang ajanga Delhi nung civil services atema telemtetba agitsü asoshi Delhi Assembly nem tashi agütsüogo; iba bill ya agizükra Centre sorkari tanga state assemblies madak-a tashi amshitsü aser parnok atema telemtetba agitsütsü, ta ashi.

Chowdhury-isa, "Kedangsertemi sorkar ketdangtsütsü süra MPs aser MLA temji kechi atema shim? Iba ama bill benokba ajanga inyakyim

meraksatsütsüla," ta ashi.

Tesüsa Lok Sabha nung iba bill agizükba mapang nung opposition MP temi longkak aita kimai ayazüka alu.

Taküm May ita nung Supreme Court-i Delhi nung officer tem transfer sütsüba aser posting lezmüksüba tashi AAP sorkar nem agüja liasü.

2014 küm AAP-i Delhi assembly election nung takok ngua sorkar akümba sülen küm ka dang lirbo Centre sorkari Services Department ya LG kübok asütsü tetuyuba agüja liasü.

Centre aser Delhi sorkar na tsüingda iba tashi raktepba ken o nung Chief Justice, DY Chandrachud leniba nung constitution bench kati, administration tashiji nüburtemi shimtetba sorkar ket nung alitsü nüngdak, ta oshidang agüja liasü.

Brihostibarnüsa Rajya Sabha nunga Press & Registration of Periodicals Bill agizükogo. Iba bill ajanga tang aliba ozüing melentsü.

Press and Registration of Periodicals Bill, 2023 ya voice vote ajanga agizükra liasü.

Iba bill dak sendakba nung o lemtepba mapang Information & Broadcasting Minister, Anurag Thakur-i, iba bill ajanga media aser publishing companies inyakyim tezübaba akümtsü, registration melamela agitetsü aser bendangeri yimsüsüba mapang nung aliba ozüing tejen aika agientsü, ta metetdakja liasü.

### Temang-telen tenla agütsüba asemsü agi teimba kümogo: Mandaviya

New Delhi, August 03

(Agencies): Brihostibarnü health & family welfare union minister, Dr Mansukh Mandaviya-i, tesüiba küm ter tsüingda India nung temang shilem-telen balala tenla agütsüba asemsü agi teimba kümogo, ta metetdaksü.

"2013 küm linük nung temang shilem tenla 5,000 agüja liasü saka tangbo küm shia temang shilem tenla 15,000 dak tema agütsür. Nisung ka nem taküm agütsüba dak alaka meimchirtem atema inyakba mapa tulutiba mali," ta Mandaviya-i ashi.

Brihostibarnü New Delhi nung 13buba Indian Organ Donation Day (IODD) sentong nung jembidang pai iba osang ya metetdakja liasü.

13buba IODD sentong ya temang shilem tenla agütsür asür kinüngertem nem tetushi agütsütsü, asürtem indang temang shilem tenla agütsütsü asoshi ajungshitsü aser temang shilem tenla agütsüba maparen nung inyaker medical nisungtem nem tetushi agütsütsü nükjidong nung ayongzükra agiogo.

Iba sentong nung jembidang Dr Mandaviya-i, temang shilem

tenla agütsüba maparen nung shilem agir ajak nem tetushi agütsütsüji kanga tongtibang, ta ashi.

Union Minister-isa, "2013 küm temang shilem tenla agütsütsü atema melungteter nisung 5,000 liasü saka tangbo küm shia temang shilem tenla agütsür nisung 15,000 dak tema lir," ta metetdaksü.

Union Minister-isa, linük nung temang shilem agütsürtem teimba akümtsü atema Centre sorkari mapatong aika benoka inyakdar, ta ashi.

Temang shilem tenla agütsürtem nem sodi anogo 30 agüja liasü saka tangbo anogo 60 tashi sodi agütsür aser arrshi küm 65 tashipurtemi dang temang tenla agütsüteta liasü saka tangbo iba telatetbaji agienadokogo, ta pai ashi.

Linük nung temang tenla agütsütsü atema ajungshitsü atema sorkari ano maaneni mapatong aika benoka inyaktsü, ta pai metetdaksü.

2010 küm nungi tenzükra Indian Organ Donation Day (IODD) ya küm shia amonger, aser iba anogomong nung temang shilem tenlaba indang awareness agütsür.



August 03, 2023 nü New Delhi nung actor aser BJP MP, Hema Malini-i par adianu, RK Chakravarti-i züluba 'Galloping Decades' kaket Ato kilonser, Narendra Modi nem agütsüdang tangokba noksa nung angur.

### Küm 9 tsüingda NES nung terenlok atema sen 3.37 lakh crore indokogo

New Delhi, August 03

(Agencies): Tesüiba küm 9 tsüingda northeast state tem nung terenlok mapa inyakba nung sorkari sen 3.37 lakh crore indokogo, ta

Brihostibarnü Union Minister Anurag Thakur-i Rajya Sabha senden nung metetdaksü. Tasüingdangba ka langzüdang minister-i tesüiba küm 9 tsüingda Modi sorkari northeast nung lenla balala nung terenlok mapa inyakba osang metetdaksü.

Northeast nung gari lenmang kilometer 8,480 aliba nungi tangbo kilometer 16,000 kümogo, ta youth affairs & sports minister-i metetdaksü.

Tesüiba küm 9 tsüingda region nung airport-a anasü agi teimba kümogo aser rail connectivity-a tajungba kümogo, ta pai metetdaksü.

"Tesüiba küm teku tsüingda Ato kilonseri (Narendra Modi) Northeast region 60 ben semdangogo, aser ibaji ajanga sorkari iba region nung terenlok atema süoki ia kanga nendaka inyakba kuli sayur," ta pai metetdaksü.

Tang central sorkari kübok depratments balalai northeast nung sen crore 15,760 jenjang project 1,350 teinyakdak lir, aser tesüiba küm 9 tsüingda northeast region nung sen crore 3,37,000 shi indokogo, ta paisa metetdaksü.



August 03, 2023 nü New Delhi nung National Federation of the Blind küm 50 ajungba Golden Jubilee nung nükpokertemi ken atandang tangokba noksa nung angur.



## TIR YIMYIM YIMOBILEM (EDITORIAL)

DIMAPUR ROGONÜ, LUROI (AUGUST) 04, 2023

### Tenük-telen Tenla

- Tangsen Lemtur

**T**enük-telen tenlartem aser parnok kibongtem nem tetushi agütsütsü atema küm shia August 3 nü Indian Organ Donation Day (IODD) sentong ayongzüka agir. Brihostibarnü (August 3, 2023) 13buba IODD anogomong sentong nung health & family welfare union minister, Dr. Mansukh Mandaviya-i, tesüiba küm ter tsungda India nung tenük-telen balala tenla agütsüba asemsü agi teimba kümogo ta metetdaksübjaji ajanga temang shilem/tenük telen balala tenla agütsütsü atema nüburtem ajungshitsü aser rajemdaksütsü atema awareness agüja aruba amajokbo masü ta kuli sayur. Union Minister-i, "2013 küm linük nung temang shilem tenla agütsür nisung 5,000 liasü saka tangbo küm shia temang tenla agütsür 15,000 dak tema kümogo," ta metetdaksü. India nung tenük-telen balala tenla agütsütsü atema sorkari mapatong aika benoka inyakdar; item rongnung tenük-telen tenla agütsürtem nem sodi anogo 30 agüja aliba nungi tangbo anogo 60 tashi sodi agütsür aser arrshi küm 65 tashipurtemi ang temang tenla agütsüteta liasü saka tangbo iba telatetbaji agienadokogo. Nisung kati pa temang nungi tenük-telen mashie ka agizüka nisung kar nem tenla agütsütsü akok, mesüra nisung ka asüba sülen par kinüngertemi tasü mang nungi tenük-telen tenla agütsütsü akok. Tetezü tenük-telen tenlaji taküm lia agütsütsü akok mesüra sür sülen-a agütsütsü akok. Kanga bulua tenlaba tenük-telen rongnung tezungjang, temelungjang, temesen, dar, tepokpok, teret, teret-tenungla, teküp aser nukjang lir. Item tenük telen karbo taküm lia dang tenla agütsütsü akok saka teimbaka sür sülen dang tenla agütsür. India nunga Tamil Nadu, Maharashtra, Andhra Pradesh aser Gujarat state tem nungbo tenük-telen tenla agütsütsü melungteter aika kümogo, ajisüaka northeast India nungbo nübur aikati tenük-telen tenlaba indang junga rajema mali, ta survey ka ajanga bushitetogo. Guwahati (Assam) nung survey ka agiba ajanga bushitetba agi, iba survey nungji shilem agir shilem 79.17-i tenük-telen tenlaba indang terabo meteter liasü saka nisung aseme dang tenük-telen tenla agütsü. Survey nung shilem agi shilem 12.5-ibo tamangba yimsü tsütsülen nungi nisung aikati tenla magütsür südi mesüra item tenla magizüker südi ta bilemer. Ano shilem 51.67-ibo northeast nung tenük-telen tenla agütsüba indang rajema maliba agi tenla magütsür ta bilemer. Tang linük balala nung tenük-telen balala nungdaker aikati mapang nung tetenlar manguba tebilemtsü tulu lir, aser iba ya tanga kecha masü saka meimchirtemi nisung kar taküm alangzüksü mesüra kar taküm junga lidaksütsü atema melungsoa metenlaba agi lir. Tanü putu nung Khristan denomination balalai temang shilem-a (organ) tenla agütsütsü ajungshitepba mapang nung asenokbo aikati tenük-telenbo yutsür azü tenlatsü-a memelunger. Roman Catholic Khristantemibo pei temang shilem kar tenla agütsübjaji temeim mapa ka ta züngshir. Ano tamanger karibo asenoki temang shilem kar tenla agütsüra ibaji ajanga asenok tanaben shia arudang timtem alitsü südi, ta ratamata Laishiba nung iba dak sendakba Lai tekong karbo ali asü, ta bushir. Temang shilem ajak ya Tsüngremi asenok nem angati agütsü, anungji iba jenjangji angateta nungdabapurtem nem temang shilem tenla agütsütsü junger ta bilemer.

## OLEMSABANG

### PAR AKA, ASEN MAKA...!

- Lipoksungkum Imsong

(Maneni yashi adok nung...)

6. **IIM – Indian Institute of Management.** India nung ajak agi 20 lir aser north east nung bo ajak agi Shillong nung kaaliba jidang. *Management* ya kanga bulua agiba *subject* ka asü nung *state* shia kaka bo sa lapoktsü ta India nung yimsüsürtemi telemtetba ka agira; aser Nagaland nunga lapokra ajia shiri bener oadoktsü? IIM sa masü yonga NU nung *Management Department* lir ji Fazl Ali mesüra Mokokchung district kübok college ka nung danga *Management subject* ji agitettsüsa asen kini danga temulung agüja bushidangtsüla.
7. **Communication (lenmang):** Mokokchung Mariani lenmang ya? Assam den sendaktep lenmang ana – Mariani lenmang aser Amguri lenmang. Oda Amguri lenmang joko tuluba len renemdar aser iba lenmang ya Asetkong Langpangkong Jangpetkong Japukong len nungi Longleng Mon Amguri Dibrugarh Jorhat den ajuruteptsü *National Highway* lenmang tongti ka asü nung anebalua ayutsükanga shitak. Iba den Mariani lenmang ya Mokokchung HQ len nungi Jangpetkong, Mangkolemba, Japukong, Tzürangkong, Mariani, Jorhat aser Dimapur leni ajurutepba lenmang ka asü nung oda tang amai dang bo meyi nung tzülu aser tzüngküm nung lisem auyi lenmang ama bomeyulima. Ainlen jajar atema Jorhat *airport* mesüra sickmani aortem atema Jorhat Dimapur Gauhati atongtsü ji iba lenmang ya jungra mapang tatsütiba nung lua atongtsüsa yanglutsü mapang tongja tongogo. *Departmenti* yanglutsü saka kin aser lokti temi anir *pressure group* asütsüla. Lenmang ya *governmenti* yanglutsü talang kechiyong aji *National Highways* mesüra *State Roads* kübok lir. *Road & Bridges, NH Department*tem kechi atema? Asenok *crowd funding* süli lenmang dena asenoki yangluli ta sayuba ya asen sasa asen ali tur aremer dang. Asen temeten bo sa meshizükdi ja.
8. **Sports infrastructure:** Stadium tajung ka bo alitsüla tu? Asen Lenir nungtemImkongmeren *Sports Complex* ya tenüng a dena tai. *Sports complex* asütsü metemsü. Ariana *football ground* liraser ibajia tasayari dang metet aser idakji odangeri junga metet, kechi tia nung lir ar. Iba anasa tu *indoor stadium* bo lir saka *volley balltournament* kar asayaba sülen bo kiyir *reception* dang timba agia lidi. Ya aseni khangzüksüla a ja. *Sports* asayatsü bo MDFA aser *tournament* balala nung *Chief Guest*temi ajungshir saka *ground*aser *sports infrastructure* bo yanglua yutsür a masü nung. *Minister MLA* tultur tem ya joko Naga nung dak *potential* lir ta ashiba ya anener, *governmenti* / ozü *Departmenti* / mesüra ni yanglutsüogo ta shia tenzüksü talang. Tang*futsal pitch*shika lapoka oa aliba ji sorkar i masü kija aser nija indang dang. Hau shirnoki yanglua lapokogo kanga junger aser parnok anema kecha mali. Saka, nungdak adokaka*Departmenti* meinyaksü aser asenok nüburi *crowd funding* süli inyakli ta sa asübo *departmentji* meinyakba dang akümtsüa ja. Aser külen bo parnok auyatsü lenmang sademtsür.
9. **Land of fashion and music** ta, ano iba sülen *Land of Pioneers* ta melen a tu na? Süra *pioneering institute* mesüra *infrastructure* ka bo ali mali asenyimkong, asen yimti, asen jila nung ji? Mesüra *music* tsütsü *fashion* tsütsü jia kecha (*concrete*) lapoka ali mali. *Diploma in Fashion Technology*, iba course yaa Kohima nung akaba *Polytechnic* nung dang agütsüdar ko. *Music* indang jia Kohima & Dimapur temeküt nung dang lapoka lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

## Uganda nung asüpila sentong ka nung Pastor dak azük

**Nairobi (Kenya), August 01 (Agencies):** Anüdoklen Uganda linük nung asüpila sentong ka nung pastor kati o tejembidak mapang nung Muslim nungertemi pa dak azük aser agi long agi aon.

July 21 nü Mayuge district kübok Kyoga yimdak Arogo züngsem ka asüba sülen arrshi küm 39 pastor, Davidson Okirori-i ketdangsüa asüpila sentong agiba mapang nung pa dak azük.

Covenant Church of God Arogo nung züngsem, Vanisha Namukasa gari lendong ka nung yiruba sülen hospital nung temongdak mapang asü.

Hospital yipten nungi osangbener den jembidang pastor-i, "Astürji Muslim yimsü toktsür Khristan yimsü agizüker ka liasü. Kü ket nung Koran aser Laishiba naprongla bona liasü. Laishiba abenbaji Tsüngrem chir Yisu tasü nungi shia aruba tashi sayutsü atema liasü aser Koran kaketi Muhammad ji Allah indang ainkar ka dang liasü aser pa tasü nungi shia maru ta sayutsü atema liasü," ta

metetdaksü.

"Asüpila sentong nung adener Muslim nungertem den Khrista temeim lemsateptsü atema ibaji ni asoshi sabang tajung ka liasü," ta pastor-i ashi.

Asüpila sentong nungji mangyimertem den jembitsü atema pai microphone bona aruba mapang nung sayutsüngitsü atema pai kaketi ajak amshitsü apiteta liasü, ta pai ashi.

"Item kaketem nungi Lai tekong balala azüing tenzükba mapang nung lanur kati 'Na mamanger ka, anungji onok den tiyazü tejembi. Na ner nübür tasü mang remtsütsü atema aru süra yamaji inyakang, ajisüaka Koran tamshi, kechiyong iba ta ozü Allah Tsüngrem mezüingmeshiba lir' ta ashiba ni angashi," ta pastor-i ashi.

Muslim nungeri kari pa ket nungi microphone rakzük aser kari Laishibaji shisatsü; iba sülen parnoki pastor dak lung agi aon tenzükba liasü.

"Parnoki ni nokdaka aliba tsütsülen lung agi aon aser lung kati kü dak onshiba sülen

ni ali nung laoadok. Iba sülen Muslim nungeri kati hadir kati kü tebang yirutsü. Iba sülenjibo ni kechisa atalokar memetet. Ni Mulago Hospital nung saakba mapang nung kü temang aser süoshi ajak nung azü liasü," ta pastor-i ashi.

Asüpila sentong nungji Muslim nungertem dang nungibo Khristantem teimba liasü, anungji tesüsabo Khristantemi Muslim nungertemji nokdangteta liasü.

Iba tatalokba nung Pastor tekolak, teberem aser teka yirua hospital nung mongdar.

Uganda linük temzüng aser tanga ozüing balala ajanga tamangba yimsü temeden ajak nem agütsür aser pei tamangba yimsü tangar den-a lemsateptsü aser tangar temelung meyipdaksütsü temeden agüja lir, ajisüaka mapang shia Khristantem anema inyakba tatalokba aika lir.

Uganda nungeri nütsüing shilem 12 dang Muslim nungertem lir, ajisüaka parnoki mapang shia nütsüing teimba Khristantem nem timtem agütsür.

## Uttar Pradesh nung pastor ka kibong rangben jail nung puok

**August 03, 2023:** Uttar Pradesh state nung Protestant pastor ka, pa kinüngtsü aser par jabaso arrshi küm asem tanur ka densema parnok ajak jail nung puokogo.

Amongnü par kidang tekülem sentong agiba mapang nung police-i parnok apu.

Pastor Harendra Singh aser pa kinüngtsü, Priya Singh na police-i apuba sülen July 31 nü Judicial ket nung agüja liasü.

Pastor o kinüngtsü nati par jabasojia tena den jail-i anir ao.

India nung aliba jail tem nung tsürabur, talisa tetsütem jail nung puokra parnok chir arrshi küm 6 ser tekübok tanurtembo tsürabur den ayutsü melar.

Amongnü Uttar Pradesh nung Barabanki district kübok Haidargarh jila nung pastor aser pa kinüngtsü na leniba nung tekülem sentong tagidak mapang nung police arua parnok puer ao.

Pastor aser pa kinüngtsü nati tai maket nübürtem Khristan yimsü dangi meyipdaksür, ta kari tai tongloksüba nung ajemdaker police-i parnok apu.

Pastor Singh-ibo, ibaji tiyazü ta ashi ajisüaka par kibong dang asüingdangyatsü atema parnok ajak police station-i anir ao.

Iba sülen August 1, 2023 nü Uttar Pradesh Prohibition of Unlawful Religious Conversion Law, 2021 ozüing kübok par kibong anema ken o benok aser local court ka

matsüingdangi anir ao.

Court nung Khristantem temeden atema inyaktsür Dinanath Jaiswal-i, "Par jabaso arrshi küm asem tanur-a parnok den jail-i aitsüsa akümba ya tesasatsüka lir," ta ashi.

Khristan lenir kati, Uttar Pradesh nung Khristantem anema inyakba ya anogo shia ataloker amai kümogo, ta ashi.

Paisa, "Sarasadem sentong agiba mesüra Laishiba azüingba kija agia na jail nung puoktsüsa tensa ka aruogo," ta ashi.

July 30 kija nung Uttar Pradesh nung tatalokba balala nung pastor asem densema Khristan 15 puogo, ta Khristan lenirtemi metetdaksü.

Kasa anogo nungji Ghazipur district kübok Balapur yimdak nunga Pastor Amarjeet Ram den Khristan pongu pua liasü. Local court kati parnok nem bail magütsüi judicial ket nung agütsüogo.

August 2, 2023 nü osangbener den jembidang Jaiswal-i, "Ano tanga tatalokba ana nung Azamgarh district nung Khristan pongu aser Jhansi district nung Khristan ana pua jail nung puokogo," ta metetdaksü.

Jaiswal-isa, Khristantemji jail nung chioksü atema pai temaba court tem nung temepishiba ken otem benoktsü asoshi inyakdar, ta metetdaksü.

Uttar Pradesh nung anti-conversion ozüing kübok tamangba yimsü meyipba

nokdang. India nung nütsüing teimtiba aliba state (Uttar Pradesh) nung tang BJP sorkar lir aser Khristantem anema inyakba tatalokba teimtiba aliba state jia Uttar Pradesh lir.

New Delhi nung amenoka aliba United Christian Forum (UCF)-i, taküm küm tenzükur June ita tashi nung Uttar Pradesh nung Khristantem anema inyakba tatalokba 155 lir, ta metetdaksü.

Kasa mapang nung India tesem balala nung Khristantem anema inyakba tatalokba 400 lir, ta UCF-isa metetdaksüogo

Nütsüing million 20 dak tema aliba state nung nütsüing shilem 0.18 dang Khristantem lir.

## ANOGO ABEN TSÜNGREM DEN

### Tashi Tasen Kümshiba

**T. Ken 119:81-88**

Mapang ka nung ajak teraksaleni aotsü amai. Osang tamajung angashir. Ajaklen meputepba osang angashir aser angur. Tanurtem school nungi yirur mesüra osang tamajung bener arur. Mapa nung tamakok angur. Item anogo nung item mapang tamajung rongnung ka ne dangi aru nung, nai kechi inyaktsü ?

"Ne tekümsük asoshi kü nelai lulaa akümer: saka ne tenangzükba nung ni imlar. Ne tenangzükba repranga kü nük chilar, nai kodang ni süneptsütsü? Kechiyong mokozü nung yi shikep pungdang ama ni kuma lir; aji saka ne telatet ozüing ni mamar. Asükümeri ni asoshi kangla tua lir, parnok ne ozüing nung malir" (t.81-83,85). Yangi nisung ka lulaba aser tamakok anguba angur. Pa mokozü nung yi pungdang ama liasü. Kolenisa odir idakji pa asongtsü ongken tua liasü. Pai kechi inyak ? Pai Tsüngrem dangi meyip. Pa teimla angudak Tsüngrem O liasü.

Nai tensa tia dak dang yimlara, na mepelai akümtsü, kechiaser aji melenshir. Ken züluri O nung imla aser Tsüngremer mulungtetba nung amang, aser Tsüngremi pa süneptsü.

Nisungtemi na toktsütsü, saka Tsüngremi na kodanga metoktsür. "Ne temelaba ozüing ajak atangji lir, parnoki aibelena ni rishikangshir; nai ni yariangma" (t.86). Ken züluri tesünep, teyimla aser Tsüngrem tamang katetba nung azüet, aser tashi tasen kümshiba metetta aküm. "Ne temeim yimli bilem yari ni roka asoa kümdakjangma. Angji ne bang ozüing ni bilemtettsü" (t.88). Tsüngrem Tangula temerük den aru, kotaker mopong- Tanela Temeshi- aser pa asentenshidaksü.

Pa molung lemtet asoshi Tsüngrem tenüing asanger. Anogo tamajung ka nunga Pa temulung lemtetba lir. Pai ne tashi tasen kümtsütsü aser tensa tia atena ajungkettsü aser maneni aotsü.



Indonesia kübok Sungai Bahar, Muaro Jambi nung Indonesian Pentecostal Arogo Tenla ki tawa renemba sülen kobi melii jara kati Tenla kidangi aoba lenmangji nokdangogo. Iba Arogo nung züngsemtemi dokan ka nung tekülem sentong agia aru aser tesüsa tenla bendena Tenla ki renem, ajisüaka iba Tenla kidangi aoba lenmang mokdanga shibangtsüba anema pastor-i Regional Representatives Council nem ken o agütsüogo.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Rongbang**  
(n) rongsen abangdak, shishilembadak (market place, treasure place)  
\* Akhi tsüraburtembo tzüma **rongbang** nung dang shishia liasü.  
**Rongchi**  
(n) alu nung rong chidoka inyakba mapang (time of reeds cutting in the field)  
\* Rong achiba ita dang **rongchii** (April) ta ajar.

**OLONG PAITEP # 6596**

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN		LANGTSÜNGLEN	
1. Anenzükdak ki	-(5)	1. Reprangdaksü	-(4)
3. Asür mangyimba	-(5)	2. ___ ur	-(3)
5. Temulung nung shisadang	-(5)	4. Kiojen yangludak	-(6)
8. T ___ lu	-(3)	6. _____ ait	-(7)
10. Takdang temalen	-(9)	7. Nagaland nung ayong ka	-(5)
11. Tesa ___ a	-(3)	9. Küm kasa purtem	-(5)
13. Ajungbena temulungjang		10. Tetsüng tajemetdak	-(6)
tongtonglatsü alu	-(5)	12. ___ adenshi	-(4)
15. Tejen lai nung tesayur	-(5)	14. Tsünusenbongsü adokdak	-(3)
16. Tsüngsak-mopung	-(5)		

**OLONG PAITEP # 6595 TELANGZÜBA**

TIPIEN :	LANGTSÜNGLEN :
1. Kasa, 6. Rangben,	1. Khu, 2. Sүjak, 3. Onүk,
7. Mait, 9. Poktet, 11. Ati,	4. Oba, 5. Anү, 6. Ratet,
13. Atasa, 16. Rür, 17. Rajang,	7. Mozü, 8. Ita, 10. Tar, 12. Tinu,
20. Lanu, 24. Nүngjem,	14. Salem, 15. Aja, 18. Anүнү,
25. Süra.	19. Taju, 21. Ano, 22. Onү,
	23. Kua.



**ALOKBA O WARAKLA NA TIA :**

**Alokba o Warakla na tsüngda temeim mokonga aküm nung Counsellor ka dangi oa timtem lemsateper.**

- Counsellor** : Kwa nena kechi timtem aliar tamasa Waraklai shiang jung.
- Warakla** : Ayaa Sir, tambu küna lir joko küm metsü junga arur, pai kü den tejembia mejembir, office nungi kanga menur dang shilanger, kidang asa-lentong kecha mali, yipdena balala kümoko niini, taji nibo palaba tajungba amai bilemera.
- Counsellor** : Okola Alokbaia kechi ashir?
- Alokba** : Ni kechi balaka ashitsü, lai ashiba amajiang ati.
- Counsellor** : Oh ya ni mapa ka sayudi, Oko nai jungjunnga repranga atang no. (Idangji counsellor bai Warakla dakji kanga anepalua azüit aser mimshijaa kiss asü aser mapang tatsüka azüita kazür chiok)
- Counsellor** : Oko Alok, nür tantsüi ibaji hopta nung anabenbo nungdakera, angatetet südi?
- Alokba** : Shitaka Sir, hopta nung anaben nungdaker süra Hombar aser Hokolbar ananüji ni nü dangi anirsa arutsütsüar.
- Counsellor** : Oh Alokba!!

~ Lilir : WhatsApp

**ITLF lokti tasü mang aremtsü setong aliba sota ata**

**Imphal, Luroi/August 3 (Agencies):** Indigenous Tribal Leaders' Forum (ITLF)-i, Union Home Ministry den sensak amenba sülen lokti tasü mang aremba sentong ayongzükur aliba thinentsü telemtetba agiogo.

ITLF-i taoba mapang lokti tasü mang aremba sentong ya Brehostibarnü Churachandpur district kübok Haolai Khopi anasa S Boljang nung agitsü ta sangdonger liasü.

Ajisüaka Home Ministry den sensaksemba sülen iba lokti tentet yagi parnok sentong anogo pongu agi thinena atatsü asoshi telemtetba agia liasü. Parnokisa, sorkari parnok

takhangba pongu dak sendakba nung tezüluba nung tenangzükba agütsütsüla ta ashi.

Home Ministry-isa, parnok dang mangatettep aliba ya anogo tenet tsüngda tajungtiba nung bentettsütsü ta tenangzükba agütsüogo.

Manipur nung kin o kin na mangatettep adokba sülen nisung 150 dak tema taküm samaogo aser nisung meyrejang 60 shi jenshir lir.

Maneni ITLF-i, iba tebilemtsü takaratiba nung bentettsü atema sorkar nongshitsü, ta metetdaksü.

Kasa mapang nung Imphal yimti aser Bishnupur district nung maneni mangatettep

adoka liasü. Source ajanga ashiba agi, mepetmesü nung densema aliba nisungtemi security forces indang armoury nungi prangbong aser injang aika auyaogo.

Osang ajanga ashiba agi, Bishnupur district nung ozüng alema inyaksangshirtemi security forces indang prangbong 300 dak tema aser injang aika auya liasü.

Maneni Manipur kübok Kangpokpi nung tetsürtemi district kübok tesem kar nungi Assam Rifles tem agintsü khanga longkak aita liasü.

Kangpokpi districts nungsa tesem kar nung injang kar akhaba osang angazükogo.

**Rajasthan assembly screening committee mendenbuba asütsü Gogoi shim**

**Guwahati, Luroi/August 3 (Agencies):** Taruba Rajasthan assembly elections atema screening committee mendenbuba mapa abentsü asoshi AICC tir Mallikarjun Kharge-i, Assam nung Lok Sabha MP Gaurav Gogoi shimogo.

Screening committee ya Gaurav Gogoi lenisüba nung inyaksangshitsü, kong Ganesh Godiyal aser Abhishek Dutt na züngsem lir.

Sangdong ka ajanga Assam Pradesh Congress Committee Secretary Gaurav Somani-i ashiba agi, lenir tejentem

anidena candidate tem kanga junga asadangtsü atema party-i inyaksangshidar.

Somani-isa, screening inyakyim ya record tajung aliba, nükjidong tejangja aliba aser nüburtem tenzüktsü asoshi tejangraba aliba lenirtem jangjatsü atema rangloker inyaksü, ta ashi.

Paisa, AICC tekolakba Mallikarjun Kharge-i, Rajasthan assembly elections atema party renemshiba mapang party züngsem ajak aser party pusemertem dang pei akokba yari teyari agütsütsü ayongzükogo, ta

ashi.

Rajasthan assembly election ya state legislative assembly nung züngsem 200 prongla shimtsü atema 2023 küm December ita mesüra iba matongdang agitsü.

Rajasthan legislative assembly indang tenure ya 2024 küm January ita 14 nü tembangtsü.

Taoba assembly election ya 2018 küm December ita agia liasü. Election tembangba sülen Indian National Congress-i state sorkar kümtet aser Ashok Gehlot state indang Chief Minister küma liasü.

**Assam nung retired engineer ka tepsetba atema nisung 4 apu**

**Guwahati, Luroi/August 3 (Agencies):** Guwahati, Assam nung Hatigaon Police-i, retired engineer Javed Ali Ahmed tepsetba atema nisung pezü puogo.

Osang ajanga ashiba agi, police pua alirtem rongnung Darog Ali, Mahibul Islam, Nur Mohammad aser 'Boga' ta ser nisung ka densema lir.

Barpeta district kübok

Baghbor aser Tetelirtal tesem police temi meita aoba sülen nisung pezü ya pua liasü.

Osang tejangja angazükba sülen police-i mezüng Darog Ali pua liasü.

Ken o ashishiba sülen pai tanungba nisung asem tenüng metetdakja liasü.

Par pezüi kechiba iba engineer ya tepset iba indang tang tashi mejangjai lir.

Ajisüaka police-i, tsükchitep aliba mesüra auyaba ken o densema lenla ajak nungi ken o bushisüngdangdar.

July 27, 2023 nü Ahmed ya Hatigaon nung anepdang yakta mosque-i oya aliba mapang tepseta liasü.

Pa ya Hatigaon Police Station nungi meter 100 shi dang pilar mendanga atar tepseta liasü, ta osang ajanga metetdaksü.

**Bajrang Dal arms training ken o atema nisung 2 apu**

**Mangaldoi, August 3, 2023 (Agencies):** Hindutva telok Bajrang Dal-i tawa Assam nung lanur 350 shi ka nem arms training agütsüba dak sendakba nung Assam police-i nisung 2 puogo.

Bajrang Dal-i arms training sentong ayongba anema FIR ka benokba nung ajemdaker police-i nisung ana apu.

Bajrang Dal-i July 27 aser July 30 tsüngda Mangaldoi nung school ka nung arms training camp ka ayonga agi. Iba nung lanurtem aden.

Police-i apuba nisung anaprong ya arms training sentong agiba school den sendaktepa lir.

Police-i apurtem rongnung Hemanta Payeng dena lir aser pa ya School managing committee indang president lir.

Külen, Ratan Das ya iba school nung staff lir.

Ajisüaka Hemanta Payeng-i FIR ka benokba nung Abhijit Ghosh ta ser nisung kati July 27 nungi school nung yoga camp ka alitsü atema temelaba meshiba indang shia lir.

Media nungi dang Bajrang Dal ajanga arms training camp agiba osang pai angazük ta Payeng-i ashir.

Bajrang Dal indang arms training camp indang video ya social media sabang balala nung prokshia liasü aser iba nung Assam kübok tesem balala nungi lanurtemi shilem agi.

Assam nung Bajrang Dal-i arms training camp agiba anema nisungtemi state sorkar aser Darrang district administration aitsütsü tenzükba liasü.

Iba dak sendakba nung

Mangaldoi police station nung Indian Penal Code (IPC) sections kübok Arrla balala nung ajemdaker FIR ka benokogo.

Assam police-i Abhijit Ghosh aser Subrata Ghosh na aputsü atema lookout notice agütsüogo.

"Iba training agiogo aser iba ya Bangladesh nungi ozüng alema arurtem den raratsü atema agiba lir" ta Rashtriya Bajrang Dal vice-president Nilav Ritu-i ashi.

Iba training camp nung lanurtemi martial arts, weapons, survival skills, quick thinking, politics, Vedic rituals, ideological orientation aser hand-to-hand combat angazükba liasü.

Praveen Togadia-i aniba Rashtriya Bajrang Dal ajanga Assam nung lanur 50,000 youths aniokba osang metetdaksüogo.

# Niger nung mitkar bukuma longkak aitba manener

**Niamey, Luroi/August 03 (Agencies):** Niger nung democracy yimya nung shimba Tir Mohamed Bazoum taoba hopta pa anüker temi atsüngdokba bukumer noklang aika linük yimtiba nung adenshia liasü aser kari Russia nung nisan tulutem ayiptena liasü.

France nungi nüchiso ngur küm 63 ajungba anogo nung civil society associations teloktep kati ayongzükba ama longkak aiter tem ya Brehostibarnü yimti tiyong nung aliba Independence Square nung adenshia liasü.

"Onoki France nung maginer, shirnok 1960 nungi onok rongsen auya arur. Parnok tanü tashi lir saka temelenshi kecha maka," ta longkak aiter kati ashi.

Niger nung France sepai 1,500 shi lir aser parnok ya Sahel nung telungpur telok balala den rarar.

Mitkar temi tashiyim amshia sorkar atsüngdokba mechi Economic Community of West African States (ECOWAS) nungi temerenshi tenokdangba balala agütsü aser African Union, United Nations aser Western linüktemi aitsü.

Saka tashiyim amshia sorkar

atsüngdokba nung lenir General Abdourahamane Tchiani temolung memelenshi lir aser amokmeren kecha tsüboa mali, ta pai Bodhbarnü ashi.

Brehostibarnep United States Tir Joe Biden-i Bazoum aser par kibong tekeraba nung chioktsü aser linük indang democracy wazüka ayutsü ayongzükba liasü.

"Tang tensa mejungi aliba mapang Niger nüburtem den United States nokdaka lir aser democracy nung tera yanger küm aika tesendaktep nung aruba akumtsübor aser civilian-i anir yimsü asüba bukumer," ta pai ashi.

"Pei lenir shimtsü Niger nübur dak temeden lir. Parnoki talenba makai tim yimya amshia election agiba nung parnok tejangraba sayuogo aser aji akumtsübotsüla."

Arishi küm 63 tain Bazoum atsüngdokba ya Russia-ia aija liasü. Wagner mercenary lenir Yevgeny Prigozhin-i Niger coup bukumer amai ajitetba sülen Kremlin-i iba taittsüba ya sangdonga liasü.

2021 election nung Bazoum-i takok anguba ajanga Niger nung civilian nem yimjung nung

tashi melenoktsü aser 1960 küm France nungi nüchiso ngur asemen tashi mitkar temi tashiyim amshia yimsüsür atsüngdoktsü meranga aruba linük tasen tenzükshir ama imla liasü.

Deobarnü ECOWAS ajanga coup lenir dang hopta tsüngta Bazoum nem tashi tanaben agüjang aji mesüra mitkar tashi amshitsüsa akumtsü ta ashiba aser ano French embassy tezülen longkak aitba mechi European linük temi pei nüburtem anizüker ao tenzükogo.

Rally mapang mission indang kijiba raksatsü aser longkak aiter temi France anema yimyim ayima liasü.

Nisung 1,000 jungnüa France-i anir ogo, kong France senso timba aser ano United States aser Germany nungia lir.

France-i Niger indang military government tasenba dang Niamey nung par embassy kumzükba ayutsü asüngdanga liasü.

France sensotem Niger yutsür aotsü nüngdak mali aser parnok asoshi timtem kecha mali, ta Tchiani-i Bodhbarnü ashi.

# Pakistan mitkartemi election tsübor: Imran Khan

**Lahore, Luroi/August 03 (Agencies):** Taküm küm tatemlen agitsü imla aliba election ya mitkar temi kanga tsübor, ta Pakistan indang taoba ato kilonser Imran Khan-i BBC Hardtalk dang ashi.

Fascists temi linük tammang putui anir aor, ta pai aitsü.

Khan ya 2018 küm election ajanga shimtet aser küm pezü majung ato kilonser mapa inyaker taoba küm parliamentary no-confidence vote ka ajanga atsüngdok.

Tashi tait mitkar temi mesakloki akumba ajanga pa iba tia ajuru südi, ta aikati ashir.

Pakistan mitkar temi küm aika linük amokbanger yimsü süa aru.

Khan-i par Pakistan Tehreek-e-Insaf (PTI) party ya dang mitkar lenirtemi tentetba party masü ta ashir, saka pa linük ato kilonser akumba mapang army temi yaria liasü, ta pa anemer temi ashir.

Iba yongji par party samatsütsü meranga meparen balala inyaka arur, ta pai ashi.

Tesüiba ita ishika tsüngta lenir aikati party yutsü aser tongti züngsemtem apu. Saka Khan-ibo par party meraksai lir ta ashir.

"Sorkari yimjak nung onok anema nokdakaka, loksatsütsü merangaka aser onok sorkar nung meliaka menden 37 atema by-elections agiba nung onoki menden 30 nung takok angu," ta pai BBC nungi Stephen Sackur den sensaksemba mapang ashi.

Pa yimsüsüba menden nungi

agenba ajanga par party tashi maitba akumtsü 'establishment' teimla liasü. "Na yimsüsüba menden nungi pila lira yamajisa asür. Saka yamaji masü party tali tashi taitba akum," ta Khan-i ashi.

"Parnoki ajak inyakdangogo. Parnoki tetsür aser yimjung nung longkak aiter densema nisung 10,000 tepuokdak ayu. Parnoki nüburtem reshikangshia amshi.

Pa bukumer temi Khan ya 'political outsider' aser ochimashi mapa agi mokongshiba nisung ka ama züngshir aser pa ato kilonser menden nungi atsüngdoktsü mitkar temi tasa yanglu ta aitsür, saka army temi iba taittsüba magizüker.

May ita court ka telung nung pa apudang nüburtemi pa metetba tashi sayu aser linük tesem ajungalen longkak aita liasü.

Pa bukumer meyirijang aika Pakistan kübok yimjong nung jaja, mitkartem aliba ki raksatsü aser kar nung mi senloksü. Par party nungi züngsemtem densema nisung aikati Khan aitsü aser pai rongrongshirongtsü ajungmeso ta tenüng asen.

Ajisüaka taoba mapang international jenjang nung cricket asayar nüngtugu, Khan-i item rongrongshirong nung pa shilem mali aser item ken o kanga junga bushisüngdangtsüla, ta shia liasü.

"Army, commander temi ni pua bener aoba kü bukumer temi angudang parnok kechi

inyaktsü amai bilem? Longkak maittsüla liasü na?" ta pai ashi.

Ni aputsü atema police tem yoktsü melena sepaitem yokba mepetmesü mitkar temi tenzükdaksü, ta Khan-i nenshia ashi.

"Linük nung teraksa tulu ajurutsüsa jenjang ka nung lir. Asenok tammang putu kati aor ama ni bilemer," ta pai Lahore nungi ashi.

"Pakistan atema solution ajak agi election ochi aser timi agitsüba dang lir. Iba tepenja nungi anitetsü asoshi lenmang ajidang lir," ta pai ashi.

Ita ishika tsüngta parliament nung temzüng ozüng balala indang jembia aruogo aser aika Khan aser par party election nung shilem agitsü asoshi tasak kumdaktsütsüsa mesüra khenyongi shilem magidaktsütsüsa yangluba lir ta ashir.

Bill benokbatem rongnung ka nung army intelligence officer tenüng temai adoktsür küm asem tashi tepuokdak ayutsü indang lir.

Ibai talisa Khan-i mitkar aser itdangiter lenirtem tali aitsüba mapang ka angashir. Pa anema tasa tamajung yanglu ta Khan-i itdangiter tanishirtem densema yimjak nung tenüng tuteta jembia arur.

"Tia maka fascists temi linük nung yimsü asür aser parnok elections agitsü kanga tsübor. Elections nung onoki akoktsü ta parnok metetba ajanga ni tim atemer. Aser iba yongji parnok democracy raksatsür," ta pai ashi.

# SÜR KÜM KA AJUNGBA MENUNGRA BILEMTETER



**ASÜR NUNGSHIRENLA LONGSA**  
Tasüba anogo : 4-8-2022

Tamangtir ojala, tanü na onok den meliaka nü sarasadem tesüngjem sayu o tajung onok mulungjang nung teti lir. Nü temeim aser temoatsü agi onok taküm piyong len anitsü.

- Temeim Chirnurtem, Semchirtem & Kinungertem.

## Office of the Kangtsüng Senso Telongjem Tuli Dist. Mokokchung, Nagaland

### Tenüngsang Agütsür

'O Tsüki' tezülur **Wb. I. Temjentoshi Longkumer**-i Aug. 2, 2023 anogo nung asen tensa mapang den apet kakat tajung ka sayaogo. Pa shisa tarok agi shisaluyimertem asoshi kakat tajung züluba atema KSTT-i kangasa pelaba lemsateper aser tenüngsang agütsür.

Iba kakat ajanga nübor jenti tajangzük angutsü timla tulu yua Tsüngrem nungi temoatsü meshitsür.

Sd/-  
**TEMSUINBA**  
President, KSTT

Sd/-  
**MASAKUMZUK**  
Gen. Secretary, KSTT

## SANGDONGER

Mrs. Bendangnaro W/o Lt. Imtiniken Imchen (Lakhuni), la aser lar chirnur den sen-o-tsü aputepba ajanga timtem, mepet-mesü kar danga adokra iba khuretji asür Imtiniken Imchen kinunger aser anükapangtem khuret masütsü ta sangdonger.

Sd/-  
**Asür Kinungertem & Anükapangtem**

# Singapore nung temesepba mozü mechi ano nisung ka alenset

**Singapore, Luroi/August 03 (Agencies):**

Hopta ana majungdang Singapore nung temesepba mozü shibelenba nung aibelenba mechi nisung tasembuba nem tasüba temerenshi agütsüogo.

Ethnic Malay nung arishi küm 39 tain Mohamed Shalleh Abdul Latiff, shiba delivery driver ka ama inyaka liasü, pai heroin gram 54 shibelenba mechi Changi Prison nung tekong nung süngzü pongoker alenseta südaktsü, ta Singapore indang Central Narcotics Bureau ajanga Brehostibarnü ashi.

Pa ket nungi apuba heroin ya temesepba mozü amshir nisung 600 dak tema hopta ka peria liasü, ta bureau ajanga ashi.

Temesepba mozü shibelenba mechi iba city-state nung ketdangtsür temi arishi küm 45 tain Saridewi Binte Djamani aser arishi küm 57 tain Mohd Aziz bin Hussain tepseter anogo ishika dang lir Mohamed Shalleh ya alenseter, anungji United Nations aser human rights organisations temi ola adoker.

Singapore nung mapa tamajung inyaker nem temerenshi tesashi agütsüba asoshi alimai meteta lir, aser COVID-19 pandemic mapang küm ana nisung alensetba anena ataba sülen temesepba mozü dak sendakba nung bendanger densema nisung 16 nem tasüba temerenshi agütsüogo.

Ken o jembiba mapang Mohamed Shalleh-i ashiba agi, pa dang sentsüh aliba pa tembar kati nokdanga aliba cigarettes bener oa agütsüdaktsür ama amangdakja pa külakoktsü.

Ajisüaka tena tsüngta yamaji tamang katettsüsa tesendaktep meliasü, ta Singapore judge kati Mohamed Shalleh aitsü.

Singapore nung tang tesüsa tasüba temerenshi agütsüba yagi ano iba Southeast Asia linük nung temesepba mozü indang ozüng yanglushitsü linük balalai akhangba tali akumtsü.

Taoba hopta Office of the United Nations High Commissioner for Human Rights ajanga Singapore nung tasüba temerenshi amshiba anena atatsü ayongzükba liasü.

Singapore ya international financial centre ka ama züngshiaka temesepba mozü amshiba nung aibelener nem tasüba temerenshi agütsüba linük ishika rongnung China aser North Korea den züngsemer.

Iba linük nung cannabis gram 500 dak tema aser heroin gram 15 dak tema shibelenem nem tasüba temerenshi agütsütsü ozüng lir.

Ajisüaka Amnesty International and Human Rights Watch ama rights groups temi iba ozüng yagi temesepba mozü amshiba tajemba mekumdaktsür, ta ashir.

## Women's World Cup : Morocco round of 16-i iogo



**Luroi/August 3, 2023**

**(Agencies):** Brehostibarnü Colombia den asaya nung Anissa Lahmari-i Morocco atema goal ka idakja parnoki asaya goal 1-0 agi kokogo aser round of 16 tongtetogo.

Perth nung Morocco-i Colombia akokba sülen parnoki point trok nguteta Group H nung parnok goal difference agi Colombia sülen tanabuba jenjang nung tembangogo.

Kasa telok nungi Brisbane nung Germany aser South Korea na asaya goal 1-1 nung tembangba sülen team anaprongla asayamung nungi tuguogo.

Round of 16 nung Colombia team Jamaica den asayatsü

aser Morocco pur France den asayatsü.

Morocco asoshi iba asaya akokba ya tamamangtsüka liasü shirnok mezüngbuba asaya nung Gremany-i goal 6-0 agi koka liasü. Iba sülen tanabuba asaya nung parnoki South Korea akok aser tasembuba asaya nung Colombia koka liasü.

Asaya nung goal ka ya asaya mezüngbuba shilem tembangtsü lia idakja liasü. Asaya nung Daniela Arias-i box telung nung Ibissam Jraidi alangdaksüba sülen Morocco nem penaltsü metsütsü maongka agütsü.

Penalty ya captain Ghizlane Chebbak-i metsü ajüsüaka

goalkeeper Catalina Perez-i kanga junga nokdanga liasü.

Perez-i nokdang meyipa atokba ball ya Sakina Ouzraoui-i agizük aser Lahmari nem agütsü shibai aibelen mesüi goal idakja liasü.

Iba asaya metenzükdang yongi Colombia teambo last 16 atema qualify süatoker liasü.

Asaya ya Colombia team-i amokbanger asaya aser goal ka achiba sülen parnoki goal idaktsütsü atema kanga meranga asaya ajüsüaka goal magütsütet. Parnoki goal idaktsütsü asoshi maongka yangluteta asaya ajüsüaka Lahmari-i idaktsüba goal ya meküptokteti asaya tembanga liasü.

## MDCA-i ayongzüka U-16 tebur aser tetsür open trials agiogo



**Dimapur, Luroi/August 3 (TYO):** Mokochung District Cricket Association-i ayongzüka August 2 nü Coach Neehal Ahmad tawabangba kübok U-16 Boys aser Women's (All Categori) open trials agiogo. Iba den ben denloksema August 3 nü Nagaland Cricket Association (NCA) Vice President Herato Sukhalu-i, MDCA indang Practice Pitch asadanga liasü.

U-16 Boys aser Women's (All Categori) open trials koba Imkongmeren Sports Complex nung agia liasü, iba trail nung Mokochung district nungi dang masü saka Longleng district nungia asayartemi shilem agia liasü. Trails nung Mokochung nungi asayar 23 (tebur 9 aser

tetsür 14) aser Longleng nungi asayar 3-i (tebur 1 tetsür 2) shilem agia liasü.

Coach Neehal Ahmad tawabangba kübok batting, bowling, fielding, aser wicket-keeping skill tem dak rangloker trail agia liasü. Iba trail ya district nungi regional aser national asayamungtem nung asayatetsüpurtem shimtsü nükjidong nung ayongzüka agiogo.

Kasa mapang nung Nagaland Cricket Association (NCA), Vice President Herato Sukhalu-i August 3 nü MDCA indang practice pitch asadanga liasü. Pai iba tesem semdangba ajanga grassroots jenjang nungi lanur asayartem cricket asaya nung ajungkettsü atema club

bendanga agütsür aliba sayur.

Iba tesem semdangba mapang Sukhalu-i, MDCA ketdangsurtem den sensak asem aser lanurtem anitetba aser Mokochung nung cricket asaya ajungketba atema pai MDCA nem tenüngsang agüja liasü. Paisa, iba facility kanga junga anepaluba ngua temulung asüba lemsatet. Maneni pai local jenjang nung cricket asayatsü ajungshitsü aser nongita yaritsü atema NCA tejangraba aliba lemsatet liasü.

MDCA-isa, NCA-i maneni nongita yariba atema tenüngsang agütsü, koba ajanga Mokochung nung cricket asaya renloka aoba aser takok anguba nung tongtibang shilem agida, ta ashi.

## Australian Open: Srikanth aser Sindhu na quarterfinals-i iogo

**Luroi/August 3, 2023**

**(Agencies):** India tsür rongnungi Olympics nung medal ana tashi ngur alila P.V. Sindhu aser taoba No. 1 asayar Kidambi Srikanth nati Brehostibarnü tang asaya aliba Australian Open badminton championship nung pei tata asaya koka quarterfinal tongtetogo.

Sindhu, shibai 2016 küm Rio Olympic Games nung silver medal aser Tokyo 2020 nung bronze medal ngua liasü, lai külem India tsür Aakarshi Kashyap 21-14, 21-10 agi ayong ayonga koka liasü. Tena tsüngda minute 29 asaya liasü.

Kasa mapang nung tebur kija asaya nung Srikanth-i, Quaycentre kübok Court 3 nung tanabuba round asaya nung Chinese Taipei nung asayar Wang Tzu Wei na asayaba sülen shibai kokdir Su Li Yang 21-10, 21-17 agi

koka liasü.

Sindhu aser Aakarshi na tang mezüngbuba asaya liasü aser Sindhu-i la tajangshiba dak amendaker iba asaya amokbanger asaya ayong ayonga akok.

Sindhu iba asayamung nung seed pongububa asayar lir aser la taruba asaya Malaysia tsür Beiwen Zhang den asayatsü shibai tanabuba round nung 19-21, 21-10, 21-12 agi Huang Yu-Hsun koka quarterfinal tongtetogo.

Maneni Srikanth, shibai mezüngbuba round nung Japan nung asayar Kenta Nishimoto 21-18, 21-7 agi koka liasü pa quarterfinal nung India nung asayar Priyanshu Rajawat aser Chinese Taipei nung asayar Wang Tzu Wei na asayaba sülen shibai kokdir pa den asayatsü.

## Clifford Miranda India U-23 men's team head coach kümogo

**New Delhi, Luroi/August 3**

**(Agencies):** Indian men's U-23 football team head coach mapa abentsü atema All India Football Federation (AIFF)-i Brehostibarnü Clifford Miranda shimogo.

Pa den AIFF technical committee-isa, Nallappan Mohanraj assistant coach, Raghuvir Khanwalkar goalkeeping coach, aser Gavin Elias Araujo fitness coach asütsü shimogo.

Coaching staff sangdongba den AIFF-i AFC U-23 Asian Cup Qatar Qualifiers nung züngoksemsü atema asayar 28 shimba sangdongogo.

Technical committee senden ya India nung football asayar tejen IM Vijayan lenisüba nung video conferencing ajanga agia liasü, kong Pinky Bompal Magar, Harjinder Singh, Arun Malhotra, Climax Lawrence, Eugenson Lyngdoh, aser Syed Shabir Pasha nungeria shilem agia liasü.

Miranda ya taoba mapang 2005 nungi 2014 tashi India team nung midfielder ka liasü aser head coach ka ama pai tajangshiba aika bena lir. Pa asaya aliba mapang national team-i SAFF Championships ana, Nehru Cup ana aser AFC Challenge Cup ka koka liasü.

Club jenjang nung Miranda, Dempo SC nungi asaya aser NFL/I-League title pongu tashi bena liasü.

Maneni pa ya India nung coach tem rongnungi Indian Super League (ISL) nung tongtiba asayamung ka akokba mezüngbuba coach lir. Pa

lenisüba nung Odisha FC-i Super Cup koka liasü.

Asayar ka ama aser coach ka ama pa record kanga tajung lir aser pa lenisüba nung Indian men's U-23 football team tejakdangi aotsü imlar.

AFC U-23 Asian Cup Qatar 2024 Qualifiers koba September 6 nungi 12 tashi Dalian, China nung asayatsü lir iba ya taruba küm Paris nung asayatsü aliba men's Olympic football tournament atema qualifier ka asütsü.

India team August 12 nungi tenzüka Bhubaneswar nung camp ka ayongzüka agütsü. Iba asayamung nung India team Group G nung China, Maldives aser UAE den ata lir.

**Asayartem yamai alitsü:**

**Goalkeepers:** Sachin Suresh, Hrithik Tiwari, Prabhukhan Singh Gill, Arsh Anwer Shaikh.

**Defenders:** Narender Gahlot, Hormipam Ruivah, Bikash Yumnam, Halen Nongtdu, Sanjeev Stalin, Sumit Rathi, Jitendra Singh, Abdul Rabeeh.

**Midfielders:** Thoiba Singh Moirangthem, Lalrinliana Hnamte, Jiteshwar Singh Yumkhaibam, Ayush Dev Chhetri, Vibin Mohanan, Brison Deuben Fernandes, Amarjit Singh Kiyam.

**Forwards:** Sourav K, Vikram Partap Singh, Parthib Gogoi, Rohit Danu, Ninthoinganba Meetei Khumanthem, Gurkirat Singh, Ayush Chhikara, Sivasakthi Narayanan, Suhail Ahmad Bhat.

## BILEMDANGANG

"Tamagitsü o aika jembiba dang nungibo tagitsü o ka jembiba tajungba."